

Ա. Ա. ՂԱԶԻՆՅԱՆ

ԱՌԱՔԵԼ ԲԱՂԻՇԵՑԻ

(Կյանք)

Ինչպես միջնադարյան մեր շատ տաղերգուների, այնպես էլ Առաքել Բաղիշեցու մասին կենսագրական տվյալները սակավ են և կցկտուր: Հայտնի է, որ նա ծնվել է Վասպուրականում Բաղեշ քաղաքից հյուսիս-արևելք ընկած Պոռ գյուղում և ծննդավայրի՝ Պոռ գյուղի անունից էլ երբեմն կոչվել է նաև Պոռեցի¹:

Առաքելը, սակայն, իր ստեղծագործությունների մեջ, որքան հայտնի է, չի գործածել այդ մականունը և իրեն բացառապես կոչում է Բաղիշեցի՝ ծննդավայրին սահմանամերձ Բաղեշ (ավելի ուշ՝ Բիթլիս) քաղաքի անունից, օրինակ՝

«Ես Առաքել նուստ ոգի, մեղօք լցեալ Բաղիշեցի...»²:

Նրա տաղերից մի քանիսը, որոնք բանակապ (ակրոստիքոս) ունեն, նույնպես հողում են Բաղիշեցի անվանաձևը: Դրանցից է, օրինակ, «Ահա եհաս ինձ օր մահու մարմնոյ նիթական» սկզբնատողով տաղը, որի բանակապը հողում է «Այս յԱռաքել վարդապետէ Բաղիշեցոյ»³:

Ծննդավայրից բացի, հայտնի են նաև Բաղիշեցու ծնողների անունները, հորը՝ Ներսես, մորը՝ Խոթիկու-Մելիք: Կ. Պոլսի առմանը նվիրված ողբի հիշատակարանում Բաղիշեցին խնդրում է հիշել ոչ միայն իրեն՝

Այլև ծնողաց իմոց բարի Խոթիկու-Մելիք և Ներսէսի,
Որ զառածեալս մեղաց գերի, ծնան զաւակ ողորմելի⁴:

Այս մասին կան այլ վկայություններ էլ, որոնցից կարևորը հենց իր՝ Բաղիշեցու ավանդածն է. «Աղաչեմ զընթերցողսրդ յիշման արժան առնել զմեղաւք զառածեալս Առաքել: Եւ զվարժապետն իմ քաջ նահատակն զբարունապետն Գրիգոր: Եւ զըստ մարմնոյ ծնաւզքն իմ զՆերսէս և զԽոթիկու-Մելիք և զղեռարոյս ծաղիկն Յովանէս և զհամարէն միաբանք սուրբ անապատիս»⁵,— գրել է նա 1431 թ. իր ներբողյաններից մեկի հիշատակարանում:

1 Ղ. Ա ի շ ա ն, Հայապատում, մասն Ա, Վենետիկ, 1901, էջ 126:

2 Նկարագրութիւն հոգևոր վարուց Յովասափու..., Վաղարշապատ, 1897, էջ 131:

3 Հայկական ՍՍՀ Մինիստրների սովետին առընթեր Մեսրոպ Մաշտոցի անվան հին ձեռագրերի ինստիտուտ (այսուհետև՝ Մատենադարան), ձեռ. 8294, էջ 125ա: Նշենք, որ Բաղիշեցուն երբեմն շփոթել են համանուն մի ուրիշ բանաստեղծի՝ Առաքել Սյունեցու հետ, բայց շփոթությունը հիմնականում վերաբերում է ժամանակակից այդ երկու հեղինակների գործերին, մեկի ստեղծագործությունը մյուսին վերագրելուն, քան կենսագրական առանց այն էլ սակավաթիվ փաստերին: Մատենագիտության մեջ Բաղիշեցին ենթադրաբար նույնացվել է նաև Առաքել երեց անհայտ մի տաղերգուի հետ: Վերջինիս մասին այդ վարկածի հեղինակ Հ. Անասյանը գրում է. «Անծանոթ տաղերգու, որի անունով մի քանի հոգևոր տաղեր ենք գտնում ԺԵ—ԺԷ դարերում ընդօրինակված ձեռագիր տաղարաններում, թվում է, որ նույնն է Առաքել Բաղիշեցու հետ» (Հ. Ա ն ա ս յ ա ն, Հայկական մատենագիտություն, Երևան, 1959, հ. Ա, էջ 1155—1156): Այս հարցերին, սակայն, կանոնադաշտանք Բաղիշեցու վերաբերյալ մատենագիտական հարցերի առնչությամբ, նկատի ունենալով, որ շփոթության խնդիրը, ինչպես ասվեց, առանձին գործերի հեղինակային պատկանելությանն է վերաբերում և ոչ թե կենսագրական տվյալներին:

4 Մատենադարան, ձեռ. 3081, էջ 102բ, 1636, էջ 210ա, 1682, էջ 89ա, 3668, էջ 154բ-8968, էջ 124բ և այլն:

5 Ա Ր Տ ա լ ա ղ ղ ա Ր ք. Ս ի Ր մ է Ե ա ն, Մայր ցուցակ հայերէն ձեռագրաց Ծրուսաղէմի սրբոց Յակոբեանց վանքի, հ. 1, 1948, էջ 132:

Ինչպես տեսնում ենք Բաղիշեցին ունեցել է մի զավակ՝ Հովհաննես անունով, որը համաձայն մի այլ հիշատակագրության⁶ եղել է ծաղկող, այսինքն՝ նկարիչ և ունեցել է նախ սարկավագի, ապա նաև քահանայի աստիճան և մահացել է երիտասարդ հասակում: 1453 թ. նա արգեն վախճանված էր և բանաստեղծ հայրը՝ Առաքելը խնդրում է իր ընթերցողներին ողորմի տալ՝

Սև զաւակին իմ բաղձալի՝ տէր Յովհաննէս քահանայի,
Որ ի հասակ մանկագունի փոխեալ յաշխարհն կենդանի⁷:

Նշանակում է Բաղիշեցին եղել է ամուսնացած, թեև ոչ մի հիշատակագրություն չկա կնոջ մասին և, անշուշտ, միայն կնոջ մահից հետո է, որ նա քաշվել է վանք, ստացել վարդապետական աստիճան, վարել եկեղեցական պաշտոններ և երկար տարիներ եղել միաբանության առաջնորդ⁸: Հայտնի է, որ լինել ամուսնացած և միաժամանակ դառնալ վարդապետ, անթույլատրելի էր բոս եկեղեցական կանոնագրության:

Բանասեր Աս. Մնացականյանը, մի առիթով, գրել է, թե ինքը Մատենադարանի ձեռագրատանը աշխատելիս հնարավորություն է ունեցել «հավաքելու մեր միջնադարյան բանաստեղծների մասին բազմաթիվ նոր ու կարևոր տեղեկություններ» և որ «պարզվում է, որ Մկրտիչ Նաղաշը եղել է Առաքել Բաղիշեցու ուղիներ⁹: Բանասերը, հավանաբար, նկատի է ունեցել Նաղաշի կենսագրականի հետևյալ հատվածը. «Սև էր սա (Մկրտիչ Նաղաշը — Ա. Ղ.) բնական ի նահանգէն Բաղիշու, ի Պոռ կոչեցեալ գեղջէն, որդի մեծատան և աստուածարեալ քահանայի Առաքելոյ և մաւր բարեպաշտի: Էին և սմա եղբարք երկու՝ Յովհաննէս քահանայ, որ տղա հասակաւ փոխեցաւ առ Քրիստոս և միւսն՝ Արղար անուն, որ եղև երեւելի, մեծ և փառաւոր և պատուեալ յամենեցունց»¹⁰:

Առաջին հայացքից կարծես իրավացի է բանասերը. Բաղիշեցին և Նաղաշը համագյուղացիներ են: Առաքել է Բաղիշեցու անունը, այդ անունն է կրում և Նաղաշի հայրը: Բաղիշեցին հոգևորական է, հոգևորական է և Նաղաշի հայրը: Բաղիշեցին մի զավակ է ունեցել՝ անունը Հովհաննես: Նաղաշն էլ մի եղբայր՝ այդ անունով: Բաղիշեցու որդին քահանա է եղել և մահացել է երիտասարդ հասակում: Երիտասարդ տարիքում է մահացել և Նաղաշի եղբայրը՝ Հովհաննես քահանան: Հայտնի է Նաղաշի մոր անունը՝ Հոյուս-խաթուն, հայտնի չէ, դժբախտաբար, Բաղիշեցու կնոջ անունը, մի բան, որ վճռական կարող էր լինել հարցը պարզելու տեսակետից: Այնուամենայնիվ, կարծում ենք, որ սրանք բավարար չիմք չեն տալիս Մկրտիչ Նաղաշին համարելու Բաղիշեցու որդին: Նախ՝ երկու մեծանուն այդ բանաստեղծներից ոչ մեկը չի թողել ուղղակի հիշատակություն՝ իրենց հայր կամ որդի լինելու մասին և, երկրորդ, ոչ Բաղիշեցին և ոչ էլ ժամանակակիցներից որևէ մեկը չի հիշատակել, որ նա Հովհաննեսից բացի ուրիշ զավակ է ունեցել: Սվ, վերջապես, կա ուղղակի հիշատակություն, որ Նաղաշի ծնողները մահացած էին գոնե 1449 թվականից առաջ, որովհետև այդ թվականին է գրվել Նաղաշի կենսագրականը: Կենսագիրը՝ Աստուածատուր քահանան խոսելով Ամիրում Նաղաշի կառուցած կաթուղիկե եկեղեցու մասին, թվարկում է այն ընծաները, որ Նաղաշը տվել էր նորակառույց եկեղեցուն և, ի շարս դրանց, ավելացնում է. «և զայս հրաշալի Յայսմաուրբս, որ ետ յիշատակ բարի և սուրբ Կաթողիկէն, և զՏարեգիրքն՝ յիշատակ հոգւոյ իւրոյ և ծնաւդացն իւրոց՝ Առաքել քահանային և Հոյուս-խաթունին, և եղբարց իւրոց Յովհաննէս քահանային և պարոն Արգարին, Ներսէսին և Ստեփաննոսին,

6 Նույն տեղում, էջ 132: «Այլև կրկին յիշեցէք զարի և քաջ բարունապետն յԱռաքել վարդապետն և զծնաւդսն իւր ըստ մարմնոյ ղնբրսէսն և զնութիւն-մելիքն և զորդին իւր զՈվանէս սարկաւագն, որ ծաղկեաց այլ ի գիրքս»:

7 Ձեռ. 3081, էջ 102ա, 3668, էջ 154բ, 1636, էջ 210ա, 1682, էջ 89բ, 8968, էջ 124բ և այլն:

8 1432 թ. Բաղիշեցին հիշատակված է իրրև Չմշկածագի նահանգի Յազման գավառի Երկայն-Ղնկուզյաց վանքի միաբանության առաջնորդ, Գրիգոր Կուզեցի գրիչը, իր ընդօրինակած մի ավետարանի հիշատակարանում, գրում է. «... աւարտեցաւ ի Յազման գաւառի, ի նահանգին Չմշկածակի, ի սուրբ ուխտիս Երկն-Ղնկուզեց, յառաջնորդութեամբ Առաքել վարդապետի...» (Լ. Խաչիկյան, ԺՆ գարի հայերեն ձեռագրերի հիշատակարաններ, մասն Ա, Երևան, 1955, էջ 426):

9 ՀՈՍԻ ԳԱ «Տեղեկագիր», 1946, № 2—3, էջ 79:

10 Լ. Խաչիկյան, Հիշատակարաններ, Ա, էջ 622—623:

որի ի ֆրիստոս էն հանգուցեալ. ի յիշատակութիւն հոգոց նոցա և ի վայելումն աստուածապարզե զաւակին իւրոյ տէր Մեսրոպին, որոյ տէր աստուած վայելել տացէ երկար կենսութիւնս¹¹։

Մինչդեռ Բաղիշեցին կենդանի էր 1453 թ. Պարզ է. որ Մկրտիչ Նաղաշը չի եղել Առ. Բաղիշեցու որդին։

Այնուհետև, Բաղիշեցու մասին բանասիրութիւն մեջ այն կարծիքն է հայտնվել, թե նա «Գրիգոր Մերենցի եղբորորդին և աշակերտն էր»¹²։

Այս կարծիքի համար հավանաբար հիմք է ծառայել Բաղիշեցու՝ Գր. Խլաթեցուն նվիրած շափածո ներբողներէց մեկի մի ընդօրինակութիւնը, որը սկզբից ունի և՛ արձակ հիշատակարան, և՛ շափածո երեք տուն։

«Եւ ի յամի թուականիս հայոց ՊՂԳ (1425)։ Եւ եկն ի վերա երկրին արիւնակեր գազանքն՝ զօրքն Օթմանին և հեծնալքն Հոռլկանին, և առ և զերի արարին զերկիրս՝ զորս և կարացին, և շատոց արիւն հեղին։ Ընդ որս և զմեծ բարունապետն մեր և զուսաւորիչն հոգոց և մարմնոց մերոց նահատակեցին ի վանքն Յիպնա, յաւուր պենդէկոստէի կիրակլին, և անբուժելի կսկիծ հասուցին ամենայն երկրի. ևս առաւել մեղուցեալ անձին դժողի և խաւարեալ աշաց Յակորի։

Որ էր ինձ հայր գովելի
Եւ պարձանաց բարունի՝
Արեանառու մեր ազգի
Եւ հօրեղբայր գժողի»¹³։

Գծողը Հակոբն է, բարունին՝ Գրիգոր Խլաթեցին։ Ասլա ընդօրինակված է Բաղիշեցու ներբողը. որի սկզբնատառերը հոգում են «Գրիգոր վարդապետին յԱռաքելէ՝ նորին աշակերտէ»։ Հակոբի անունը հիշատակված է նաև եղբրերգի երրորդ քառատողում.

Ինձ վայ եղուկ ասմար գրչի,
Յակոբ անուն՝ գժող բանի...¹⁴

Այս եղբրերգի այն տարբերակը, որը հրատարակել են Հ. Մանանդյանը և Հր. Աճառյանը, բնագծված տողի փոխարեն ունի՝

Յակոբ անուն՝ գրող բանի...¹⁵

Հենվելով այս տողի վրա, Աճառյանը եղբրերգի հեղինակ է համարել Հակոբին, որը, իրոք, Գր. Խլաթեցու աշակերտն է եղել։ Սակայն նկատելով այն ակնհայտ հակասութիւնը, որ այդ դեպքում առաջանում էր «Գրիգոր վարդապետին յԱռաքելէ՝ նորին աշակերտէ» բանակապի և այս տողի միջև, փորձել է լուծել հակասութիւնը նույնացնելով Առաքելին Հակոբի, Հակոբին՝ Հակոբ Ղրիմեցու հետ¹⁶։ Հետագայում մեծանուն գիտնականը ինքը վերականգնեց ճշմարտութիւնը¹⁷։ Տաղի հեղինակն է Առ. Բաղիշեցին։ Հակոբ սարկավազը Հակոբ Ղրիմեցին չէ, այլ Բաղիշեցու քարտուղարը, որի մասին հիշատակում է ինքը՝ Բաղիշեցին, Կ. Պոլսի ողբի մեջ։ Սակայն շնայած այս ուղղումներին, այնուամենայնիվ, Բաղիշեցին մնաց իրրև Գր. Խլաթեցու եղբորորդի¹⁸։ Իրականում, ինչպես ակնհայտ է, Խլաթեցու ազգականը Հակոբն է։ Բաղիշեցին շատ վկայութիւններ է թողել իր՝ Խլաթեցուն աշակերտած լինելու մասին, սակայն ոչ մի տեղ՝ ոչ Բաղիշեցու և ոչ էլ ուրիշների կողմից վկայված փաստ չկա. որ նա եղել է նաև իր վարդապետի ազգականը։

11 Նույն տեղում, էջ 630։

12 Հ. Անասյան, Հայկական մատենագիտութիւն, հ. Ա, Սրևան, 1959, էջ 1106։

13 Ձեռ. 4876, էջ 519բ։

14 Նույն տեղում, էջ 519բ։

15 «Հայոց նոր վկաները», աշխատութիւն մ. Հ. Մանանդյանի, Հր. Աճառյանի, Վաղարշապատ, 1903, էջ 275։

16 Նույն տեղում, էջ 274։

17 Հր. Աճառյան, Հայոց անձ. բառ., Սրևան, 1946, հ. Գ, էջ 503—504։

18 Հմմտ. Հ. Անասյան, Հայկական աղբյուրները Բյուզանդիայի անկման մասին, Երևան, 1957, էջ 80. «Առաքել Բաղիշեցու հորեղբայր և ուսուցիչ Գրիգոր Մերենցը» և այլն։

Յարդ հայտնի չէ Առ. Բաղիշեցու ծննդյան թվականը: Բանասիրության ու պատմագրության մեջ, հենվելով նրա թվակիր առանձին ստիղծագործությունների և առանձին փաստերի վրա, Բաղիշեցուն, իրավամբ, համարել են ԺԴ—ԺԵ դարերի հեղինակ, առանց, սակայն, փորձ անելու որոշել նրա ծննդյան գոնե մերձավոր տարեթիվը:

Եթրախտարար, առայժմ հաստատուն կովան չկա նրա ծննդյան ճիշտ կամ առավել ճշմարտամերձ թվականը որոշելու համար: Հիշատակարանները ոչինչ չեն ասում այդ մասին, նրա ստեղծագործություններում եղած ակնարկներն էլ բավարար հիմքեր չեն տալիս: Այսպես, օրինակ, Բաղիշեցին իր գործերից մեկում ունի այսպիսի ակնարկ. խոսելով Ներսես Պարթևին վերագրված դուշակությունների մասին, իբրև դրանց անխուսափելի կատարման փաստ նշում է նաև այն, թե.

Ասաց գալ թաթարին, որ կատարեցաւ,
 Եւ ազգին նետողաց, որ երևեցաւ,
 Եւ շաղաքայ ազգին, որ աչք մեր տեսաւ,
 Անուն զլիսաւորին Թամուր կոչեցաւ¹⁹:

Այստեղ ակներև է մի բան. Բաղիշեցին ականատես է եղել թամուրյան արշավանքների սարսափներին: Լանկ-Թամուրը երեք անգամ ասպատակել է Հայաստանը՝ առաջին անգամ 1386, վերջին անգամ 1400 թվականներին: Շուրջ 15 տարի տևած այդ արշավանքներից ուրի մասին է Բաղիշեցու խոսքը, որոշակի չէ: Այնուհանդերձ, այս փաստն արժանի է ուշադրության. Բաղիշեցին գոնե մանկական հասակում պիտի լիներ՝ իրեն իբրև ականատես վկայակոչելու համար:

Թեև ստույգ տեղեկություններ չկան Բաղիշեցու սկզբնական կրթության մասին, ուր կամ քանի տարեկանից է սկսել սովորել, հայտնի է սակայն, որ նա երկար տարիներ աշակերտել է ժամանակի մեծահամբավ վարդապետներից մեկին՝ Գրիգոր Խլաթեցուն (1349—1425), մականվամբ Ծերենց, հոր՝ Ծերի անունից: Խլաթեցին Տաթևի հռչակավոր համալսարանի սաներից էր, աշակերտել էր Հովհան Որոտնեցուն՝ լինելով Գրիգոր Տաթևացու ուսումնակիցը: Որոտնեցու մահից (1386 թ.) հետո, Խլաթեցին վերագառնում է Քաջբերունիք՝ «Ի բնիկ գաւառն իւր», մտնում Արճեշ քաղաքի մոտ գտնվող Սուխարա վանքը՝ առ մեծ վարժապետն Սարգիս» և «անդ վարժեալ ու բազում աշխատութեամբ դեգերեալ՝ ընկերակից իւր ունենալով զմեծ ճգնաւոր վարդապետն Վարդան Հոգեաց Վանացն»²⁰, տաս տարի անց ստանում է վարդապետական աստիճան: Սարգիս Սորբեցու մահից (հավանաբար 1401—1402 թթ.) հետո Սուխարա վանքի առաջնորդ է դառնում Վարդան վարդապետը, որը խոսվածույզ ժամանակի փորձաքնններից հարկադրված փախչում է Տոսպ՝ Սալնապատ վանքը, ուր և վախճանվում է 1406 թ.: Սուխարա վանքում Վարդան վարդապետին հաջորդում է Խլաթեցին և, իր նախորդների նման, ինքն էլ ստիպված հեռանում է վանքից, վերագառնալով իր առաջին ուսումնատեղին՝ Արծկե քաղաքի Դաստակ կամ Ցիպնա վանքը, ուր և մնում է մինչև իր եղբերական մահը՝ 1425 թ.:

Բաղիշեցին բազմիցս հիշատակել է, որ ինքն աշակերտել է Խլաթեցուն, ջերմ սիրով ու խորին ակնածանքով է խոսում նրա մասին, սակայն, առանց երբեք որոշակի ասելու, թե երբևից է սկսել ուսանել նրա մոտ, որտեղ և որքան ժամանակ: Հավանական է, սակայն, որ Բաղիշեցին Խլաթեցուն աշակերտած լինի նախ Սուխարա, ապա նաև Ցիպնա վանքերում այն ժամանակ, երբ Խլաթեցին դարձավ այդ վանքերի առաջնորդը և երբ «ժողովեցան առ նա բազումք ի կրօնաւորաց և յուսումնասէր եղբարց»²¹:

Ղ. Ալիշանը, ըստ իր սովորության, առանց աղբյուրը հիշատակելու, Առ. Բաղիշեցու հետ թովմա Մեծոփեցուն ևս համարում է Խլաթեցու աշակերտ²²: Մեծոփեցին, իրոք, սովորել է Սուխարա վանքում և ուսման այդ շրջանը, ըստ Գար. Հովսեփյանի՝ վերջացել է 1406 թ. Վարդան վար-

19 Մատենադարան, ձեռ. 2398, էջ 100ա, 3081, էջ 240բ, 4287, էջ 68բ:

20 «Հայոց նոր վկաները», Վաղարշապատ, 1903, էջ 265:

21 Նույն տեղում, էջ 266:

22 Ղ. Ալիշան, Հայապատում, Վենետիկ, 1901, էջ 123: «Չորեքտասաներորդ գարուն վերջերն և յառաջին քառորդ ժե-ին, շատ հռչակված էր Գր. Խլաթեցին վասն գիտութեան և սրբակեաց վարուցն և նահատակութեան յամին 1425 զոր զըստ յայլոց յիշեն գովութեամբ իրեն աշակերտեալքն՝ Մեծոփեցին Թովմա և Առաքել Բաղիշեցի յետինս՝ նաև ոտանաւոր բանիս»:

ծնված շուրջ 1410—1415 թվականներին, 1380-ական թվականներին ծնված Առ. Բաղիշեցին, անշուշտ, կարող էր այդ թվականներին ծնված զավակ ունենալ:

Այսպիսով, շնայած ուղղակի փաստերի բացակայությանը, եղած տեղեկությունների համադրմամբ, կարծում ենք, հավանական պետք է համարել Բաղիշեցու՝ 1380-ական թվականներին ծնված լինելու վարկածը:

Բաղիշեցին արդեն իբրև վարդապետ մի ժամանակ ապրել և դործել է Տարոնի Առաքելոց կամ սուրբ Ղազարի վանքում. 1422 թ. այստեղ նա դրել է «Մեծի գալստեան Մաղկազարդի» ներբողյանը³¹, Անհավանական չէ, որ նա սրող ժամանակ եղած լինի նաև Սուխարա և Յիպնա վանքերում՝ իր վարդապետ Գր. Խյաթեցու մոտ: Որոշակի է, որ 1431 թ. Բաղիշեցին արդեն Չմշկածագի նահանգի Յազման գավառի Երկայն-Ընկուզյաց կամ Սուրբ Հովհաննես Կարապետի վանքում էր, ինչպես վկայված է նրա ներբողյաններից մեկի հիշատակարանում³², իսկ ըստ մի այլ հիշատակարանի՝ այդ վանքի առաջնորդն էր³³, իբրև այդ վանքի առաջնորդ նա հիշատակված է 1434 թ. Դավիթ կրոնավորի³⁴, 1435 թ. և Կարապետ Վանեցու, և ուրիշների կողմից³⁵: Բաղիշեցին եղել է դործունյա առաջնորդ, շինարարական աշխատանքներ է ծավալել, բարեկարգել իր ղրխավորած վանական միաբանությունը: Նա, ինչպես գրում է Հ. Ոսկյանը, շինարար առաջնորդ էր, «Վանքը կրնդարձակն նորանոր շինարարություններով և հավելվածներով»³⁶, նոր աստիճանի է բարձրանում միաբանների դործունեությունը, առավելապես արդյունավետ դարձնելով նրանց գրչագրական աշխատանքները: Այստեղ ընդօրինակված մի քանի ձեռագրեր հասել են նաև մեզ³⁷: Բաղիշեցին միաժամանակ շարունակում է իր գրական-ստեղծագործական աշխատանքները: Հավաստիորեն այստեղ են գրվել նրա մի քանի ներբողները, աստվածածինն նվիրված երկու քերթվածները, հավանաբար այստեղ է 1434 թ. նա տաղաչափել իր ծավալուն գործերից մեկը՝ «Տաղ Յովասափու» պոեմը: 1438 թ. Բաղիշեցին Մերդին քաղաքի մոտ, ինչպես ինքն է ասում «չեզր Մերտին մեծ քաղաքին», գրում է Վառվառն կույսին նվիրված գանձը³⁸: 1445 թ. Բաղիշեցին և պարոն Արևշահը Աբրահամ եպիսկոպոս Մսրցու միջոցով, Արդնիի Հովհաննես եպիսկոպոսի վկայությամբ, Երուսաղեմի Սուրբ Հակոբ կաթողիկե վանքին են նվիրում մի Հայսմավուրթ՝ զրված Երկայն-Ընկուզյաց վանքում, ավարտված 1435 թ.: Սա Սյուրմեյանի նկարագրած և մեր կողմից արդեն լրացված հիշատակված Երուսաղեմի սուրբ Հակոբյանց վանքի թիվ 25 ձեռագիրն է:

Նվիրաբերության այս փաստից առանձնապես ուշագրավ է Աբրահամ եպիսկոպոսի հետևյալ հիշատակագրությունը. «Նս նուաստ ոգիս տէր Աբրահամ Երուսաղեմայ եպիսկոպոս, ուր հանդիպեցայ ի Արդնին և երեսունը սուրբ Յակոբայ Երուսաղեմայ եկեղեցւոյն զգիրքս գայս և շուրջառ այլ պարոն Արևշահ՝ յիշատակ իւր և ծնողաց իւրոց...: Գրեցաւ ի մեծ թուին Հայոց մեծաց ՊՂԴ

31 Ձեռ. № 7375, էջ 396ա: Տե՛ս նաև՝ Հ. Ոսկյան, Տարոն-Տուրուբերանի վանքերը, Վիեննա, 1953, էջ 63:

32 Ա. Սյուրմեյան, էջ 132:

33 «... Աւարտեցաւ,— գրել է Գրիգոր Կուզեցին իր ընդօրինակած ավետարանի հիշատակարանում՝ 1432 թ.,— ի Յաղման գաւառի, ի նահանգին Չմշկածակի, ի սուրբ ուխտիս Երկէն-Ընկուզեց, յառաջնորդութեամբ Առաքէլ վարդապետի»: (Հ. Նաչիկյան, ԺԵ դարի հայերեն ձեռագրերի հիշատակարաններ, Ա, էջ 426):

34 «...Արդ, ես՝ Դավիթս, որ դրեցի, զաւետարանս տեառն Յիսուսի.

Չեմ արժանի այս սուրբ կարդի, դի կորուսի զփառս հայրենի,

Բայց գրեցաւ սա յանապատի, որ Ընկուզեաց անուն կոչի,

Ի դրունս Սուրբ Աստուածածնի և Մկրտչին տեառն Յիսուսի,

Ի դաւառիս Յերապաւսի, որ Չմշկածագ այժմ կոչի,

Չեռամք Դավիթ կրանատրի, որ եմ դերեալ սատանայի:

Արդ, դաւաջնորդ սրբոյ ուխտիս, ըզԱռաքել վարդապետիս,

Տացլ Յիսուս պարդևս բարիս, միաբանիցս առ տէրունիս»:

(Հ. Աճառյան, Յուցակ հայ. ձեռ. Դավիթի, Վիեննա, 1910, էջ 12):

35 Ա. Սյուրմեյան, էջ 130—132:

36 «Հանդէս ամսօրեայ», 1960, № 7—9, էջ 371:

37 Մատենադարան, ձեռ. № 4206, Երուսաղեմի սուրբ Հակոբյանց վանքի մատենադարան, ձեռ. թիվ 25 և 1957:

38 Ձեռ. 424, էջ 278ա:

(1445) մարտ ամսոյ ԻԳ (23) ի փառս աստուծոյ հար, ամէն, յաւուր ասագ շարաթու երեք-շարթի արն, ի Դամասկոս քաղաք»³⁹:

Այս հիշատակարանին անդրադառնալուց առաջ, սակայն, ասենք, որ Բաղիշեցու մասին վերջին ստույգ տեղեկութիւնը վերաբերում է արդեն 1453 թ. երբ նա, լսելով Կոստանդնուպոլսի ողբերգական անկման լուրը, գրում է իր հայտնի Ողբը՝ Բյուզանդական կայսրութեան այդ վերջին պատվարի խորտակման ցնցոյ գույժի ազդեցութեան տակ:

Արրահամ եպիսկոպոսի հիշատակագրութիւնից առանձնապէս կարևոր է «Հանդիպեցայ ի Արղնին» արտահայտութիւնը: Նվիրատուների մեջ էր: Ինչպես կտեսնենք ստորև բերված հիշատակարանից, և Բաղիշեցին: Արղյոք Արղնիում շէ. որ Արրահամ՝ եպիսկոպոսը հանդիպել է Բաղիշեցու թվարկած անձանց՝ Արղնիի Հովհաննես եպիսկոպոսին, պարոն Արևշահին, և, իհարկե, նաև իրեն՝ Բաղիշեցուն: Կարծում ենք, այդպես պետք է հասկանալ «հանդիպեցայ ի Արղնին» արտահայտութիւնը, ըստ Բաղիշեցու հետևյալ հիշատակագրութեան. «Ես՝ Առաքել վարդապետս և պարոն Արևշահ հաշտագամադայս տուաք զգիրքս զայս ի սուրբ քաղաքն Երուսաղէմ, ի գուն Սուրբ Յակոբ կաթողիկէի, յիշատակ մեզ և ծնողաց մերոց և ամենայն արեան մերձաւորաց, ձեռամբ և վկայութեամբ տէր Արրահամ եպիսկոպոսի Երուսաղէմի և վկայութեամբ տէր Յովհաննէս եպիսկոպոսի Արղնու...»⁴⁰: Բաղիշեցու՝ Արղնիին կապված լինելու այս հանգամանքը հնարավորութիւն է տալիս որոշելու նրա մահվան թերևս ստույգ տարին, ամիսն ու օրը, ինչպես նաև՝ վայրը:

Երուսաղէմի հայերեն ձեռագրերի մատենագրանի № 1198 ձեռագրի (ընդօրինակել է Դավիթ երեցը 1452 թ. Մերգին քաղաքում), ընդօրինակութեան սկզբնօրինակը, ըստ հիշատակարանի, Դավիթը վերցրել է Առաքել վարդապետից. «Ձաւրինակ տւաւղ. զԱռաքել վարդապետն յիշեցէք ի տէր և զանպիտան զրիշս զԴաւիթ երէց»⁴¹: Ո՞ր Առաքելի մասին է այստեղ խոսքը, պարզ չէ: Եվ ահա նույն հիշատակարանին Դավիթ երեցը կցել է մի տարեգրութիւն՝ կազմված իր կողմից, որը ներառում է մոտ ութ տարվա՝ 1450—1457 թթ. անցուղարձերը, որտեղ և կա այսպիսի հիշատակագրութիւն. «Յամին ԶԳ (1454)-ի յունվար ԺԱ (11), յաւուր շարաթու, վախճանեցաւ Առաքել վարդապետն յԱրղնի»⁴²: Մանոթագրութեան մեջ պատմաբան Վ. Հակոբյանը կարծում է, որ հիշված անձնավորութիւնը նույն Առաքել վարդապետն է, որն ընդօրինակելու համար Դավիթ Մերգինցուն 1452 թ. տրամադրել էր իր ձեռագիրը»⁴³: Սա հավանական է: Հավանական է նաև այն, որ Արղնիում վախճանված Առաքել վարդապետը լինի Առ. Բաղիշեցին: Այսպես ենք կարծում, նախ, ելնելով այն բանից, որ, ինչպես ասվեց, Բաղիշեցու մասին վերջին ստույգ տեղեկութիւնը վերաբերում է 1453 թ.: Այնուհետև, ինչպես տեսանք, Բաղիշեցին առաջ էլ, օրինակ, 1445 թ. եղել էր Արղնիում, 1454 թ. նույնպես կարող էր լինել այնտեղ, մանավանդ, որ Արղնին, բացի վանական կենտրոն լինելուց, հայտնի էր նաև իրրև «սամուր զղեակ», ուր վտանգի դեպքում ապաստանում էին շրջակա բնակիչները⁴⁴, իսկ այդ տարիներին, իսկապես, վտանգված էր խաղաղութիւնը: Այնուհետև, Արղնին հեռու չէր Երկայն-Ղենկուզաց վանքից, որի առաջնորդն էր Բաղիշեցին: Ավելացնենք նաև, որ Արղնիում հաճախ էր լինում նաև Մկրտիչ Նաղաշը, որը մի ժամանակ էլ վանքի առաջնորդն էր և որը եկեղեցական բարձրաստիճան պաշտոնյա լինելուց բացի, հայտնի բանաստեղծ էր և Առ. Բաղիշեցու հայրենակիցը: Մկրտիչ Նաղաշը և Առ. Բաղիշեցին, անշուշտ, ճանաչել են իրար ոչ միայն իրրև հայրենակիցներ, այլև իրրև նույն ժամանակաշրջանի գրական-եկեղեցական գործիչներ: Այդ է վկայում, օրինակ, Նաղաշի 1449 թ. գրած մի հիշատակագրութեան հետևյալ հատվածը. «Ապա յետոյ եկն Եհաս և հանգիպեցաւ առ մեզ ի յԱմիթ մայրաքաղաք ճգնաղգեաց սուրբ կրօնաւորն Յովսէփ, ձեռնասուն ռալակերտն սուրբ և»

39 Ա. Ս յ ու ը մ ե յ ա ն, էջ 132—133:

40 Ա. Ս յ ու ը մ ե յ ա ն, էջ 132:

41 Վ. Հ ա կ ո բ յ ա ն, Մանր ժամանակագրութիւններ, Երևան, 1956, հ. 2, էջ 211:

42 Նույն տեղում, էջ 214:

43 Հմմտ. Գ. Ս Ր ու ա ն ձ տ ե ա ն ց, Թորոս աղբար, Բ, Կ. Պոլիս, 1885, էջ 380—381:

44 «... Գրեցաւ սուրբ աւետարանս ի թուականիս ՊԶԶ (1437), ձեռամբ Ախիթար արեղայի... ի հայրապետութեան տէր Մկրտչին՝ վերագիտող յամուրն Արղնի բարձր Աստուածածնին և Ամիթ շահաստան քաղաքի» (Լ. Խ ա շ ի կ յ ա ն, ԺԵ դարի հայ. ձեռ. հիշատ., Ա, էջ 471): Կամ՝ 1444 թ. գրված մի այլ հիշատակարանից. «...Աւարտեցաւ սուրբ աւետարանս ի յամուր զղեակս յԱրղնի, ընդ հովանեաւ սուրբ Աստուածածնիս... ի յառաջնորդութեան սուրբ ուխտիս և յեպիսկոպոսութեան տէր Մկրտիչ արքեպիսկոպոսին, և յերեսփոխանութեան նորին՝ Յոհաննէս կրօնաւորին, ի դառն և ի նեղ ժամանակիս» (Լ. Խ ա շ ի կ յ ա ն, նշվ. աշխ., էջ 576):

աստուածաբան վարդապետին Առաքելի»⁴⁵, Որ Հովսեփ կրոնավորի վարդապետը Առաքել Բաղիշեցին է, երևում է Բաղիշեցու մասին պահպանված մի այլ, դժբախտաբար, թերի հիշատակարանից. «...և զհոգևոր որդին զՅովսէփ մեղաւորն և զկարդա(ցողսդ)»⁴⁶, Կամ նույն ձեռագրի այլ հիշատակարանից. «... Եւ առաջնորդ սուրբ ուխտիս Առաքել վարդապետին և զեռարույս ծաղկին Յովհաննէսին և Յովսէփ կրօնաւորին և համօրէն միարանացս...»⁴⁷:

Չնայած ուղղակի փաստերի բացակայութեանը, ելնելով կողմնակի այս առնչությունների ամբողջությունից, կարծում ենք, որ Առաքել Բաղիշեցին, ինչպես ասվեց, վախճանվել է 1454 թ. հունվարի 11-ին, Դիարբեքիից հյուսիս-արևմուտք ընկած Արզնի կամ Արկնի փոքրիկ քաղաքում:

А. А. КАЗИНЯН

АРАКЕЛ БАГИШЕЦИ

Р е з ю м е

Биографические сведения об Аракеле Багишеци, как и о многих других армянских средневековых поэтах, скудны и отрывочны.

В статье впервые на основании некоторых нововыявленных рукописных данных показано:

1. Багишеци родился в Васпуракане, в селе Пор, расположенном северо-восточнее города Багеша (позднее Битлис), поэтому по имени родного села и назывался иногда Порецц. Однако поэт больше известен под именем Багишеци, что засвидетельствованно в его произведениях.

2. Родителей поэта звали: отца—Нерсес, мать—Хутлу-мелик. Аракед был учеником одного из наиболее образованных людей того времени—Григора Церенца Хлатеци (1349—1425). Багишеци имел сына по имени Ованес, который, будучи уже художником и священником, скончался в молодости.

3. Приблизительная и вероятная дата рождения поэта—1380-е годы; датой же смерти, по всей вероятности, является—1454 г. На основании сообщаемых в его творчестве данных нами определены некоторые вехи жизни и деятельности поэта.

45 Է. Խ ա շ ի կ յ ա ն, Ժ Ե դ ա Ր ի հ ա յ. ձ ե ո. հ ի շ ա տ., Ա, էջ 632:

46 Ա. Ս յ ու Ր մ ե յ ա ն, էջ 132:

47 ն ու յ ն տ ե ղ ու մ: